



## **Norma sira kona-ba nomeasaun Prezidente Tribunál Rekursu no konsekuénsia poténsial sira ba obstrusaun ratifikasaun husi Parlamentu Nasionál**

### **Introdusaun**

Iha 8 Maiu 2017, Parlamentu Nasionál (PN) aprova Rezolusaun Nú. 33/III kona-ba '*Rekuza Ratifikasaun ba Nomeasaun Dr. Deolindo dos Santos ba kargu Prezidente Tribunál Rekursu*' no Rezolusaun Nú. 34/III kona-ba '*Pedidu Ezenorasaun Imediata ba Prokuradór Jerál Republika, Dr. Jose Ximenes tanba latuir kondisaun ojetiva nomeasaun ba kargu ne'e*'.

Tuir-mai JSMP sei analiza situasun ne'e ho referénsia ba Timor-Leste nia enkuadramentu judíriku, no prátika sira-ne'ebé durante ne'e akontese. Aleinde ne'e JSMP mós sei elabora konsekuénsia poténsial sira wainhira la iha solusaun própriu ba situasaun ida ne'e, ne'ebé sei implika relasaun institusionál entre orgaun soberanu sira, desizaun judisiál importante sira antes, no partikularmente sei prejudika ita-nia sistema demokrásia.

JSMP fiar katak Parlamentu Nasionál tenke hili dalan ida-ne'ebé hatudu respeita ba legalidade normativa sira kona-ba nomeasaun Prezidente Tribunál Rekursu ne'ebé durante ne'e adopta ona no estensaun ba mandatu Prokuradór Jerál Republika. Ida-ne'e sei evita efeitu negativa ba ita nia funsionamentu estadu independénte no funsionamentu tribunál sira nu'udar órgaun soberanu.

Analiza ho interpretasaun ne'e nu'udar referénsia ba realidade atuál atu ajuda ita-nia instituisaun estadu sira hodi halo analiza didi'ak no klean antes halo desizaun ruma no evita konfuzasun iha sosiedade no inserteza ba situasaun ida-ne'e. Liuliu atu asegura katak instituisaun judisiáriu sira hala'o sira nia knaar sein preukupa ho presasun politiku ne'ebé bele afeita ba integridade sistema judisiáriu.

### **Analiza legál**

Bazeia ba norma enkuadramentu judíriku iha Timor-Leste, klaru katak rezolusaun sira husi Parlamentu Nasionál la iha forsa hanesan lei. Rezolusaun sira hanesan deklarasaun polítika deit.

Rua Beco Lakateu, Aldeia Manu fuik, Suku Colmera, Administrativu Vera Cruz Dili Timor Leste

PoBox: 275 Telephone: 3323883 | 77295795

[www.jsmp.tl](http://www.jsmp.tl)

[www.jsmp.tl](mailto:info@jsmp.tl) [info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl

Klaru mós katak tuir lei, Prezidente Repúblika deit bele nomeia Prezidente Tribunál Rekursu, no nomeasaun ida ne'e la preziza ratifikasaun husi Parlamentu Nasionál. Baze legál ba autoridade ida-ne'e mai husi *Lei N.º 11/2004 Alteração ao Estatuto dos Magistrados Judiciais (Lei Nú. 11/2004 kona-ba Alterasaun Estatutu Majistradu Judisiál)*. Lei ida-ne'e altera *Lei N.º 8/2002 Estatuto dos Magistrados Judiciais (Lei Nú. 8/2002 kona-ba Estatutu Majistradu Judisiál)*. Lei Nú. 11/2004 hetan aprovasaun husi Parlamentu Nasionál iha 8 Novembru 2004, no promulga ona iha 20 Dezembru 2004.

Artigu 110 no 110 husi Lei ne'e regula kona-ba Tribunál Rekursu. Artigu 110(1) no 110(4) dehan:

<i>Orijinál iha Portugés</i>	<i>Tradusaun ba Tetum</i>
(1) O Tribunal de Recurso exerce as competências próprias do Supremo Tribunal de Justiça até à sua entrada em funcionamento.	(1) Tribunál Rekursu sei ezerse kompeténsia própria hosi Supremu Tribunál Justisa to'onia tama ba funsionamentu.
.....	.....
(4) O Presidente do Tribunal de Recurso é nomeado pelo Presidente da República de entre os juízes desse tribunal, para um mandato de 4 anos renovável.	(4) Prezidente Tribunál Rekursu nomea hosi Prezidente Repúblika hosi juís sira tribunál ne'e ba mandatu tinan 4 ne'ebé bele renova.

Artigu hirak ne'e la prevee provizaun ka norma ruma kona-ba obrigasaun atu hetan ratifikasaun hosi Parlamentu Nasionál no la defini kona-ba kargu Prezidente Supremu Tribunál Justisa, maibe regula kona-ba *delegasaun* ezersisiu kompeténsia Supremu Tribunál Justisa.

Artigu 95(3)(a) no Artigu 124(3) husi Konstituisaun RDTL nian kona-ba Tribunál Supremu Justisa nian la aplika ba situasaun ida ne'e, tanba Timor-Leste seidaun iha Tribunál Supremu Justisa nian. Tribunál Rekursu ezerse deit kompeténsia balun ne'ebé baibain Tribunál Supremu Justisa mak kaer, tuir *Lei N.º 8/2002 Estatuto dos Magistrados Judiciais (Lei Nú. 8/2002 kona-ba Estatutu Majistradu Judisiál)* ne'ebé temi iha leten. Tribunál Rekursu la mensiona espesifikamente iha Konstituisaun RDTL nian.

Kona-ba nomeasaun Prokuradór Jerál Republika, ida ne'e regula iha *Lei N.º 14/2005 Estatuto do Ministério Público (Lei Nú. 14/2005 kona-ba Estatutu Ministériu Públiku)*. Artigu 12 husi Lei refere dehan katak Prokuradór Jerál Republika sei hetan nomeasaun husi Prezidente Repúblika, no bele hetan nomeasaun fali dala ida tan. Lei ida ne'e la refere ba ratifikasaun husi Parlamentu Nasionál.

## Istória kona-ba nomeasaun Prezidente Tribunál Rekursu

Tuir observasaun JSMP nian, desde tempu Dr. Claudio Ximenes nu'udar Prezidente Tribunál Rekursu dahuluk, to'o agora, istória prosesu nomeasaun kargu Prezidente Tribunál Rekursu hatudu konfuzaun boot no inkonsisténsia barak. Maibé klaru katak maioria nomeasaun sira ne'e la sujeita ba ratifikasaun hosi Parlamentu Nasionál. Dr. Cláudio Ximenes hetan nomeasaun dalatoluk tuirmalu no iha nomeasaun datoluk mak hetan ratifikasaun hosi Parlamentu Nasionál. Depoisde Dr. Claudio Ximenes, la iha nomeasaun seluk ne'ebé sujeita ba ratifikasaun hosi Parlamentu Nasionál.

Tabela iha kraik ne'e hatudu lista nomeasaun sira ba kargu Prezidente Tribunál Rekursu:

Dr. Cláudio Ximenes, dahuluk (10 Marsu 2003) <sup>1</sup> , nomea husi Prezidente Xanana Gusmão.	La hetan ratifikasaun husi Parlamentu Nasionál
Dr. Cláudio Ximenes, daruak (12 Juñu 2007) <sup>2</sup> , nomea husi Prezidente Dr. José Ramos Horta.	La hetan ratifikasaun husi Parlamentu Nasionál
Dr. Cláudio Ximenes, datoluk (04 Outubro de 2011) <sup>3</sup> , nomea husi Prezidente Dr. José Ramos Horta, maibé depois hato'o pedidu rezignasaun-an iha 27 Feveireiru 2014.	Hetan ratifikasaun husi Parlamentu Nasionál
Dr. Guilhermino da Silva (3 Marsu 2014) <sup>4</sup> , nomea hosi Prezidente Taur Matan Ruak.	La hetan ratifikasaun husi Parlamentu Nasionál
Dr. Deolindo dos Santos (28 Abril 2017), <sup>5</sup> nomea husi Prezidente Taur Matan Ruak.	La hetan ratifikasaun husi Parlamentu Nasionál

## Konsekuénsia poténsial husi situasaun ida-ne'e

Situasaun agora daudaun kria duvidas no konfuzaun sériu kona-ba lejitimidade ba pozisaun Prezidente Tribunál Rekursu, nomós ita nia sistema demokrasia tomak.

Tanba kompleksidade no potencia risku ne'ebé boot teb-tebes hosi konfuzasun relasiona ho prosesu ne'e no ba ita nia sistema, JSMP tenta atu apresenta impaktu poténsial se karik la bele rezolve konfliktu ida ne'e ho dí'ak. Impaktu poténsial hirak ne'e mak hanesan:

<sup>1</sup> Dekretu Prezidente Nú. 06/2003, husi loron-10, fulan-Marsu 2003

<sup>2</sup> Dekretu Prezidente Nú. 57/2007, husi loron-8 fulan-Juñu 2007

<sup>3</sup> Dekretu Prezidente Nú. 43/2011, husi loron-29 fulan-Juñu 2011

<sup>4</sup> Dekretu Prezidente Nú. 11/2014, husi loron-28 fulan-Feveireiru 2011

<sup>5</sup> Dekretu Prezidente Nú. 22/2017, husi loron-28 fulan-Feveireiru 2017

1. Sei iha problema kona-ba eleisaun Parlamentár tanba sei la iha Prezidente Tribunál Rekursu ne'ebé hala'o mós knaar relasiona ho kompeténsia eleitorál, hanesan prosesu preparatóriu, rejistu partidu polítiku, verifikasaun, aseitasaun kandidatura ba partidu polítiku, legalizasaun no anúnsia ba rezultadu eleisaun Parlamentár;
2. Bele hamosu inseguransa jurídiku ba desizaun sira ne'ebé mai hosi Tribunál Rekursu durante tinan 2014- 2017, inklui rezultadu eleisaun Prezidensiál ne'ebé foin akontese no lejitimidade Prezidente Repúblika eleitu, tanba prosesu verifikasaun, validizasaun/ legalizasaun no anúnsia rezultadu eleisaun mai hosi Prezidente Tribunál Rekursu uluk nian, Dr. Guilhermino da Silva, ne'ebé antes ne'e mós la hetan ratifikasaun hosi Parlamentu Nasionál.
3. Konfuzaun sira ne'e sei prodús implikasaun negativu boot liu ba integridade sistema judisiáriu no sei afeita independénsia husi Tribunál Rekursu nomós relasaun entre ita nia orgaun soberanu sira.

## **Rekomendasaun**

Rezolusaun husi Parlamentu Nasionál kria konfuzaun barak tebes kona-ba prosesu nomeasaun ba Prezidente Tribunál Rekursu nian, no haree ba nesesidade funksionamentu regulár instituisaun demokrátiku sira, partikularmente instituisaun judisiáriu, JSMP rekomena ba:

1. Partidu hotu-hotu hodi respeita legalidade nomeasaun Prezidente Tribunál Rekursu no estensaun ba mandatu Prokuradór Jerál Republika;
2. Prezidente Repúblika no Parlamentu Nasionál atu halo dialogu no komunikasaun intensiva iha nivel polítiku nomós iha nivel tékniku atu buka dalan dí'ak liu hodi rezolve situasaun ida ne'e, liuliu atu aseguara estabilidade ba funksionamentu instituisaun judisiáriu no haree ba legalidade prosesu eleisaun;
3. JSMP husu ba na'i-ulun politiku sira atu halo analiza didi'ak no klean antes halo desizaun ruma;
4. Husu ba entidade relevante, inklui Komisaun Reforma Lejislativu no Justisa, atu propoin harmonizasaun ba provizasaun sira ne'ebé iha konflitu ba prosesu nomeasaun no knaar instituisaun relevantes sira;
5. Husu ba Parlamentu Nasionál atu emenda Lei Nú. 11/2004 kona-ba Alterasun Estatutu Majistradu Judisiál (“*ALTERAÇÃO AO ESTATUTO DOS MAGISTRADOS JUDICIAR*”) hodi aseguara konsistensia ho konstituisaun no evita konfuzaun iha prosesu nomeasaun ba kargu Prezidente Tribunál Rekursu iha futuro.